

112 年全國語文競賽客家語朗讀文章高中學生組（大埔腔）

編號 1 號

【簡單个幸福】徐姿華原作

打早，涼涼微風並柔柔天光，掀開間房个白紗窗簾，同正對甜甜夢肚醒來个僱攞手；難得个放棄日，懶在眠床看日頭輕輕徒步、聽窗外鳥聲吱啁，時間也像恬恬頓腳咧，啊！這靚靚个朝脣。

食過朝，想去遠久無見面个朋友。自家駛車，時間斯在自家个手頭項，使得慢慢行、定定奈；經過鬧熱个街市，車輪慢慢轉入鄉道，來到苗栗个穀倉——灣裡。路个兩片脣，金黃飽米个禾串硬硬會對禾田淳出來；風吹來，一陣一陣歡喜去手攘腳踏、搖頭扭腰个金黃稻浪，實在還素絲。田脣企核兩個在比手畫脚个阿伯，日頭晟來，笠嬾下晒去烏刻刻个面項，單淨看著兩排雪白个牙齒，想來應該當滿意今年係好年冬啦！

幹過一個大彎幹，共樣係闊茫茫个禾田，直直透到山下；深深淺淺个黃襯核青青个田脣、綠綠个大樹，像係天公伯个調色盤，乜係這個豐收个季節正有个景色。該向有幾坵既經收撇早冬禾，準備愛過蔣二冬禾个禾田，田水清清清，將朗朗个藍天同白雲、田脣个樹同人家屋，明明明反映出來，斯像框在田脣做个相

框肚个相，實在有罅靚。這向堵好有一坵田當在割禾，紅色个割禾機在田肚緊行緊割，三、四個人在脣項搵手，無閒濟借；割禾機背後跔歸陣白鶴，有兜低頭絡食、有兜大步行尋食、有兜飛高飛低搶食，鬧熱濟借，這斯係禾田肚盡有生命力个畫面咧啦！

車慢慢溜入莊頭，伏在路脣个老狗牯看著車來，伸懶筋企起來拂尾，像迎接老朋友个樣。一個著花衫个伯姆站在屋面前个菜園摘菜，菜園分屋蔭核、日頭旨有晒著，青荷荷个菜葉面還有露水，看來當萋、當錫人食款。兩個國小年紀个細阿俵，一儕慢慢踏鐵馬、一儕半行半走、手項還拗緊籃球，嘻嘻哈哈有講有笑愛共下去打球。這一路个光景，實在分人心情舒爽。

主人家款好一桌點心、地豆同瓜子，還有清香个高山烏龍茶，三、四個真久無見面个老朋友，天南地北講去毋知天合地。茶香、情醺，靚靚个日、靚靚个心情，這斯係簡單个幸福。

112 年全國語文競賽客家語朗讀文章高中學生組（大埔腔）

編號 2 號

【陂塘】許倩雯原作

用鏡頭記錄臺灣這片地土个導演齊柏林，坐在直升機頂對天頂看往下，形容桃園个陂塘斯像係「散落一地泥个水晶，金皙皙¹！」

兩隻白鶴一前一後在陂塘面頂飛過，白雪雪个身影倒映在平平个水面。水蓮花²對青青个水肚探出頭，細細蕊个黃花斯像天頂一瞞一瞞个星，靚都耐毋得。

立秋正過撇，陂塘斯飛來一陣準備愛過冬个人客！鬥腳鳥³水紅色个長腳，躡在淺水所在定定行，鳥觜在水肚掃來掃去，無閒在該尋食。花囉花囉个細水鴨將頭那汨入水竇，屎朶孔去半天高。忽然間，一粒扁扁个石頭飛啊過來，嚇都這陣鳥翮翼飛起。原來係陂塘脣，走來一陣細啞在該打水漂。坐在樹下擎緊釣槓个男人，大聲罵：「佢人在這釣魚，若這兜孤盲頭在該變麼个齣事，莫來這搞！」

月華跋上天頂，在水同地个合界，白鶴花⁴个清香跔緊夜風散開來。夜呱⁵醒咧，昏哆昏哆⁶个伸胘喊幾聲「嘎！嘎！嘎！」像烏鈕恁大个蜈蚣扭緊尾泗水，圓身既經生出四隻腳咧，在陂塘个一角尋所在上岸。蛇哥發現這在水肚跳出來个烏影，黏時對草竇越啊出來，開始逐厥等！

有人將桃園喊做「千陂之鄉」，這裡肚像碗公樣，大大細細个陂塘，做下係人工挖出來个。先民在開墾个過程肚當艱苦，高不將挖陂塘來頓水蔭田。陂塘盡多个時節，有萬外個，也變做桃園特殊个地理景色。逐個陂塘都有佢自家个故事，當多人第一擺个泗水、第一擺个釣魚，都係在陂塘發生。

跔緊時代个流轉，桃園都市化个程度緊來緊高。有兜陂塘失撇蔭水个功能，一個一個分人屯撇，起做機場、學校，抑係公園。伸落來个陂塘，經過整理，嘎有新生命个延續，變做現代人休閒遶寮个好所在！

¹ 金皙皙：音 gim+ si^ˋ si^ˋ；金光閃閃。

² 水蓮花：音 shui^ˆ lien^ˋ fa+；臺灣萍蓬草。

³ 鬥腳鳥：音 deu^ˋ giog^ˆ diau^ˊ；高蹺鴿。

⁴ 白鶴花：音 pag^ˋ kog^ˋ fa+；野薑花。

⁵ 夜呱：音 rha^ˋ gua+；夜鷺。

⁶ 昏哆昏哆：音 fun^ˋ de^ˋ fun^ˋ de^ˋ；頭暈腦脹。

112 年全國語文競賽客家語朗讀文章高中學生組（大埔腔）

編號 3 號

【幸福个味瑞】黃美貞原作

老古人言：「食撇五月粽，被骨正上棟。」五月節正過撇，當晝開始天時斯熱都佇毋著咧，該載堵好係梅雨季節，落過雨、起風咧，將就同冷氣關撇，行到窗門脣感受熱天難得个涼風。除撇好運看著天邊靚靚个七彩天弓，還鼻得著打馬膠路¹分日頭炙過、分雨水打過了後，淡淡、香香个味瑞，臨暗頭窗門外背一陣一陣「揸揸咿——揸揸咿——」个蟬聲，順核清風傳入屋肚來。

恁恁起還細時節，熱燻燻个下晝頭，吾這兜姊妹會同隔壁鄰舍个細人伴共下搞，輒輒搞到斷烏，聽著阿姆開聲喊：「好轉來洗手食飯咧！」正盼得轉屋。

吾爸係客運司機，平常時愛輪班，因致總係暗晡頭八、九點正下班。當記得若係堵好該日無伸麼个飯菜，吾爸斯會自家煮麵食。逐擺看佢斯同蒜頭礮礮嚟、過剝去幼幼，滴一層豆油還過香油，先放入碗公肚，續核同煮好个麵撈起來，水泌昇燥，正同麵倒到碗公肚，將麵並蒜頭、配頭攪昇勻，該央時若係聽著吾爸問：「有麼人愛食麵無？」吾這兜斯當暢，遽遽從入灶下，你一

口、恁一口，又賺著一餐香噴噴个大麵夜點心咧，食去飽餬餬，還幸福哦！吾爸將伸个飯菜間核伸無幾多條个大麵，自家儘採划落肚，斯恁泥過一餐。

又還記得，熱天臨暗頭洗好身腳，等到食飽夜，碗筷撿摯好，寫撇作業，看下電視，細人還細又好搞，差毋多到愛上眠床該下，又一身汗咧；毋過，頭擺屋家無恁好額，單淨有一個間房安有冷氣忒等。阿姆會早半點鐘同冷氣拘開來，等大家愛睡目該下，間房門打啊開來，涼沁沁个冷氣，還有阿姆拿去晒過日頭个被骨，散出香香个日頭味瑞，歸屋家人尖到兩頂眠床項，黏時斯睡落覺咧。

這幸福个滋味直直園在吾心肝頭，毋多知成人大漢、做人阿姆了後，恁正知「賺錢可比針挑笏，使錢可比水推沙。」正體會，爺哀頭擺辛苦畜大吾等恁多個細人、愛理一個家哪有恁該？毋過該愛擔个責任同義務，厥等一日都毋識放撇過。

¹ 打馬膠路：音 da` ma` gau+ lu`；柏油路。

112 年全國語文競賽客家語朗讀文章高中學生組（大埔腔）

編號 4 號

【頭回跋大山】 范振新原作

「避暑來去跋百岳，愛無？」斯因為這句話，吾等三兄弟斯跔緊滿叔，共下去跋人生个第一座大山咧。該當時，佢還毋知跋恁泥个高山有麼个特別，乜無了解跋三千米以上个山，愛知得哪兜孔竅，佢這自細斯戴山肚个半桶水，還佬著同頭擺跋个五指山、石門山這兜淺山爭七毋爭八¹，無頭無尾斯想跔緊去，正經係細和尚唸經——毋知頭又毋知尾。

記得該擺跋个係池有山同品田山，滿叔安排兩日兩夜。頭暗晡吾等先歇在武陵農場，第二日打早六點斯出發，按算斷烏進前行到新達營地。頭下碼正起腳跋該下，佢佬著自家个體力當好，平常時乜有運動个習慣，因致行當遠，想愛早兜跋上山頭。無胚想，正行點零鐘斯佇毋著，歸身大汗，還硬硬會啟氣毋出。

佢試著當奇怪，這擺愛跋山前，佢還釘工逐日去運動埋練習，仰會還係恁恁？背尾正知，係因為山頂个氧氣較少，又愛背食糧、滾水、襖婆這兜，加加起來歸十公斤个東西，身體堪毋去，正會行一細截斯啟大氣。該載，老弟乜同佢共樣，佢緊啟大

氣緊問滿叔：「會到吉？還有幾遠？」滿叔笑笑應講：「還吉得時哦，登山口都還吉到呢！加油！」聽著滿叔恁泥講，佢正經愛噉無目汁，高不將過同自家个包袱擺跔來刻耐續緊行往上。滿叔又講：「毋好行恁遠，山又毋會走撤，定定行斯好，恁咧斯頓恬來歇睏，山頂个光景當靚哦！」

正經，山頂个路彎彎幹幹，毋過見轉一個彎斯有新个天地，在山肚滿哪都係好風光，尤其係對面个群山，在半山排遠遠看過去，歸片青溜溜，還過青天同白雲不時个變化，每一分鐘、每一秒都像係無共樣个風景明信片。歸路還有鳥、蟲在該唧唧啾啾，佢斯在這大自然个音樂會裡肚，一頭享受山頂个美景；一頭手爬腳蹶繼續行。三不二時還使得看著鷓鴣在天頂，飛來飛去，感覺當自在、當自由。在佢看去惹神發琢愕个時節，玄玄風聽著阿哥大嫵聲喊：「噉！看著三角點哩啲！」佢遽遽三步做兩步走往上。等跋到山嶺頂，心肝肚个感動，分佢目汁險險流出來。

到該下佢正知，跋山恁錫人个原因。

¹ 爭七毋爭八：音 zang+ cid^ˊ m^ˊ zang+ bad^ˊ；差不多。

112 年全國語文競賽客家語朗讀文章高中學生組（大埔腔）

編號 5 號

【特別个水煎包】曾俊鑾原作

水煎包這種傳統點心滿哪都看得著，臺灣个水煎包大體係包高麗菜个，毋過當好運，偃在學校食過一種特別个水煎包。

下晝三點過後日頭轉影¹，天時較涼咧，下課同學會湊緊去打籃球，成半下會看著，一個背痾痾个外省老阿伯企在牆頭側角。佢拗核一隻籃，當像驚人知个樣，把守核一個無法度講个秘密，佢出現个時節總係這看該看，等吾等行前去，正細心細意掀開蒙在籃上背个布，該係一籃正起鑊無幾久還燒爌爌个水煎包。

吾等當在該轉骨，做下像飯豚²个樣，到下晝早都枵去肚屎憑背囊咧，逐儕歡喜轟天掄錢相爭愛買。該無帶錢又想愛食个人，愛仰結煞正好呢？厥等會講：「這擺你先請，下次擺換佢請你，好無？」兩下半，本來疊去錐錐个水煎包斯分人拿撇兩三層。

水煎包下背墊張紙，吾這兜連洗手都懶，五隻手指頭托核，擘開嘴斯齧³落去，當像毋會爌人个樣，緊呵緊講：「好食！好食！」水煎包有較赤，老阿伯當周全，既經薄薄先掌過辣油咧，

厥个水煎包係正式上海、蘇州个江南口味，豬肉做个料，摻緊雞卵、蔥、香油、鹽這兜配料，準講若个嘴罈精，你還食得出有播去綿綿个薑嫲，毋敢食辣个同學，乜試著好食。

吾這兜緊食緊同隔壁球場个人攞手，將食伸半粒个水煎包擎高高，錫厥等講愛買斯愛趕緊，機會難得，過撇這滿，下次到毋知愛等到哪時。結果，厥等做下分好食个水煎包錫錫過來，連平常時較有規矩个細妹乜湊陣走緊過來，老阿伯个嘴角慢慢翹往上咧。

毋過，一陣嘩嘩聲斯像打西北雨，同這場正起勢鬧熱个生理，打到浪浪散，高中部个教官行過來咧，佢本來斯面逼逼，這下還較像牛頭馬面，大自家走去尾瀉屎，外省老阿伯乜同籃環跣來，恬恬行往出，對哪搭出現，斯對哪搭毋見撇去。

單淨水煎包个味還留在嘴肚。

¹ 日頭轉影：音 ngid^ˋ teu^ˇ zho^ˋ rha^ˋng；日影偏斜。

² 飯豚：音 pon^ˋ tun^ˇ；喻發育中的青少年食量很大。

³ 齧：音 sen^ˋ；咬。

【整老屋】李得福原作

前一站，不時會看著阿爹坐在簷簷下看通書，手項拿筆緊寫緊記，嘴項還會緊唸講這日當好，毋過拆屋舍毋合。阿爹講：「老屋个屋頂琉璃瓦舊咧，底層攤个防水塑膠布爛撇咧，因致逐間屋都漏扯扯¹，該種防水布，細老鼠會走入去做竇，當遽壞，十外年斯愛換一擺當費氣，翻瓦奔過个工錢已傷重²。偃想換過鐵桁奔阿鉛餅³，偃做主事人，定著愛選著同偃無犯、無殺个好日脚正使得起工。」阿爹擇日个學問，吾等無學過乜聽毋識。

老屋在檳榔園裡背，用紅磚結到棟，密麻蹟跡⁴个樹桁頂，奔紅黃色个琉璃瓦，遠遠看去嶄然靚。係阿爹後生時做个四合院，總共有十五間，毋過戴無幾久，歸家屋斯徙去街路做生理，老屋門門到今有四十零年，逐日正伸著阿爹阿奶會騎奧多拜轉去祖堂拜喏。前年阿爹發覺天棚頂个樹桁，分白蟻蛀淨淨，逐間屋都斷幾下支，舊年想愛整，毋過年方⁵毋著整毋得，拖到今年大利東西

¹ 漏扯扯：音 leu` cha` cha`；形容不斷漏雨。

² 傷重：音 shong+ diong`；形容整修經費很多。

³ 阿鉛餅：音 a+ rhen` piang`；鐵皮。

⁴ 密麻蹟跡：音 med` ma` zid` ziang`；密密麻麻的。

⁵ 年方：音 ngian` fong`；每年的吉利方位。

个年方正使得整。

年頭過節轉老屋敬祖公前幾日，阿爹會請清潔公司去拚掃一遍，方便子孫拜祖公，順續辦三張桌席，大家聚餐聯絡感情。毋過舊年開始，驚琉璃瓦會跌落來傷著人，兩片橫屋都有牽索，禁止人員入去，好在祖公有保護，廳下个桁桷還好好，子孫正使得拜喏。

禮拜日轉去菁園搵手摘菁，看著拆屋師傅拿緊電鋸，坐在壁扇頂高將桁鋸斷，瓦同桁桷做一下跌落來，砰砰滾當得人驚。小山貓个推土機將廢撇無用个東西集中在禾埕，拖拉牯⁶停在路脣準備車去擲；阿爹行上行下、比手畫腳在指揮，已像拍電影个導演在拍一齣戲。阿奶買已多客家棗粿、紅粿、芋粿、粽，分做事个工人做點心，又泡一大茶罐麥茶分厥等擘。

過轉去菁園剪菁時，看著老屋既經變另外一座身影，深紅色个瓦型鐵皮奔好咧，日頭照在深紅色个鐵皮項霞光燦爛，幾下个泥水師父在修補壞撇个壁扇同地泥，水電師傅共下在整電火、巡水管。青色个檳榔園肚一座紅堡壘，係子子孫孫心靈个寄託，老屋修整前、修整後个影像永久在吾心肝肚。

⁶ 拖拉牯：音 to+ la` gu`；語源於日語「トラック」，卡車。

112 年全國語文競賽客家語朗讀文章高中學生組（大埔腔）

編號 7 號

【老屋个風景】蕭瑞琪原作

半晝邊，轉去老屋遠遠嚟。一行入屋肚，看著阿爸坐在矮凳項，報紙攤在矮桌面，佢棚¹緊目鏡在該看國家大事；阿姆坐在竹椅項，腳架在細矮圓凳項，目聚聚在看家庭副刊。日頭花對窗門斜斜戙入屋肚恬靜恬靜，眠在桌頂項个烏貓兩隻腳還揸緊報紙在該睡目，分吾个打門聲嚇下，擘開目珠懶懶看過來，又眠倒轉去繼續睡厥目。

老屋有三隻貓，做下係路脣拈轉來个。該當時還係細貓子，正擘開目無幾日，分人用紙箱張緊抨在路脣草墩項。阿爸散步經過，聽著細細个喵！喵！喵聲，正發現這兜衰過个細貓子。阿爸將細貓子帶轉屋家，倒一屑牛乳在盤肚，細貓子鼻著牛乳味，搖搖擺擺爬到盤脣，用軟軟个舌嫵緊舐，牛乳還膏在鬍鬚項變白鬚，當得人惜。三隻貓子个毛色無共樣，一隻像乳牛一搭烏一搭白，尤其四隻腳个腳趾頭前白白，已像著白襪个樣，斯同佢安名「細白襪」；另外一隻歸身係烏金烏金个長毛，斯喊佢做「長毛」；還有一隻係柑色个，又有一浪一浪个花紋，斯安做「細

柑」。毋過阿姆無恁大神氣記厥等个名，斯喊厥等「花花个」、「長毛个」、「黃黃个」。

細貓日見日大，變做活跳个大貓，不時會自家開窗門走出去野上野下，等到野瘰咧正對窗門鑽入來。貓本成係貓科動物，同獅共樣有打獵个本等，雖然經過一萬年个馴化，毋過本性無完全消失。因致，暗晡頭輒輒會走出去打老鼠、透地龍、壁蛇轉來放在門頭前；日時頭還會在陽臺晡鳥，見擺若係看著佢恬苟苟跔在該，目金金相緊屋頂，總會有飛毋掣个禾鷄、斑鳩、月鴿畀打落來。

這駁轉去老屋，總會看著三隻貓目絲絲在該啄目睡，阿姆講：「這兜貓老哩啲，無已好出去寮咧，逐日眠在屋肚睡目。」若係照貓个年紀數算，厥等也係高齡貓咧，逐朝脣兩個看報紙个老人家同三隻啄目睡个老貓斯係老屋个風景。

¹ 棚：音 pang+；戴。

112 年全國語文競賽客家語朗讀文章高中學生組（大埔腔）

編號 8 號

【一雙筷】黃秋枝原作

「好撿碗筷哦！」

佢係用筷个民族，自細斯愛學曉擎筷，學曉擎筷之前爺哀挾分佢食，佢已會使筷食飯進前，筷擎緊翹上翹下，因致無熟絡划飯挾菜个技巧，嘎挾去浴浴跌；等到會使筷該下，又好擲擲這挾該挾，挾都歸碗自家一等好食个菜類。

屋家世大人長在教講：「筷毋好恁精！好食个東西愛曉得勻核來大家食。」阿姆也教講，筷係有生日珠个，佢人想食哪樣斯看準準挾起來，毋好操去操轉搨上搨落，愛注重衛生同禮貌正好。還有，食飯个時節，筷愛擎正來，也愛遵守擎筷个規矩，千萬使毋得用筷敲碗、敲桌像乞食討食个樣；手指公同指人指愛夾核筷个上截，另外三隻手指自然彎彎對齊，夾好筷个兩頭，指人指毋好翹起來像指緊人罵樣；毋好咬筷；筷也使毋得插在飯碗个中央；食飯時拿筷準賭搞這兜禁忌。

若無，世大人斯會大聲哆：「無人教招係無？」過較嚴條个，筷頭斯掃啊去罰細人，該餐飯也有可能分世大人喝落桌。

當記得，還細時節吾屋家个筷，係竹做个，阿姆長在吩咐，

好天个時節筷愛拿到日頭下晒，若無斯會生菇上烏點，愛落嘴个東西儘採毋得，愛知「病對嘴入，禍從口出」个道理。因致，還細時節，晒筷也係吾个頭路，一支一支頭對頭、尾對尾，擺開來拿到日頭下晒。

頭擺人，勾挽人客在屋家食飯也會講：「糯米打糝罕得幾多時？便菜飯也斯加一雙『筷』忒等。」淨愛人情好，食水也甜，一雙「筷」加添人同人之間个交流同感情。還記得，有一擺愛敬床公婆搨擺菜盤，佢照佢人食飯个規矩準備一雙筷，阿姆遽遽喊講同筷拿走，相傳，敬床公婆毋使擎筷，若係擎筷敬床公婆，床公婆會拿筷教示細人這種生趣个講法。

人講，筷一頭圓一頭方斯像天圓地方；手擎筷五隻手指愛上中下配合來使，代表天地人三才；筷一分為二，又合二為一，代表陰陽結合，包容、平衡、和諧。

112 年全國語文競賽客家語朗讀文章高中學生組（大埔腔）

編號 9 號

【細日頭】胡明華原作

細日頭係阿生畜个鸚哥，兩片面頰卵有紅啾啾个圓箍，看跣來斯像細細个日頭，因致安佢「細日頭」。厥圓身白白，尾長長，頂頂有一撮長長黃黃梳到腦屎背个頭那毛，身裝當靚。

細日頭細鳥時節斯分阿生對店項接到屋家，自佢歸身無毛軟頭扁摺¹，到翼胛毛生去亮亮齊齊，盡親个斯係阿生，見看著阿生，佢斯歡喜轟天，暢都耐毋得，啾啾滾緊唱歌。佢長在企在阿生个拈食指抑係肩頭項，不時佢兼來，用嘴輕輕啣阿生个面，啣出一細截舌嫵咬佢，成半下還會咬著耳砵，迂來迂去，實在生趣。有一擺，阿生翕一張細日頭咬厥面个自拍相片，細日頭看啊著，嘎又過嘎加一到，屋家人笑都眨轉來。

細日頭个毛正生齊个時節，識飛走一擺。該日阿生毋知哪條腸毋直，攞緊鳥籠去公園，學人放鳥，望想嘍細日頭飛出去過飛轉來，望想展風神。無想著鳥籠正打啊開，細日頭翼披披，兩下半斯飛到十二樓恁高，跣緊斯無魂無影咧。阿生急都無結無煞，仰會尋去尋轉都尋無？佢歸暗晡睡毋落覺，天旨光斯緊拚拚過去

¹ 軟頭扁摺：音 ngion+ teuˊ bienˊ zhabˊ；此處指初生時長得醜醜的、皮膚皺皺的樣子。

公園尋。佢有聲喊到無聲，嘴又燥肚又渴。好得皇天不負苦心人，臨尾分環保人員在一頭樹頂尋著，一人一鳥正過再相逢。

前一駁，阿生試著細日頭大咧，斯無恁注意照顧，淨顧自家个事，陪佢个時間緊來緊少。麼人知細日頭嘎開始啣自家个毛，到有一日，兩片翼胛下總下畀啣淨淨，斯像人破病，頭那毛啟光共樣共樣，這時節阿生正緊張起來，遽遽送去鳥醫院。衰過正得啊！藥錢比人看病還較貴！

人講「惹惹惹，豬肉煮米醬；精精精，無屋好居身。」阿生原旦還佬著自家一等精，省撇陪細日頭个時間，斯賺著時間趕事，毋會仰脣，結果害著細日頭，乜害著自家，正經係假精無錢賺。

這擺阿生學乖咧，開始認真照顧細日頭，還分佢戴伊麗莎白頸圍²，免致佢過再咬翼胛下；乜知得原來做鸚哥个主人愛當用心，照顧好勢；不管佢到底係快樂抑係悲傷？係發譴抑係緊張？係肚枵抑係嘴渴？甚至，佢係毋係愠悴？都愛耐心做伴，恁泥正會人鳥兩相安。

² 伊麗莎白頸圍：音 i+ liˊ sa+ pagˊ giangˊ vuiˊ；一種圓形中空套在寵物脖子上，用來防止寵物抓或咬傷身體的項圍。。

【長薯】徐秀英原作

前一駁鼻公頭啱出一粒長薯，又紅又腫，當逆眼¹又動毋得，一恸著愛帶核佢出出入入，心情都煩躁起來咧！學生儕功課壓力大，長在目無好睡恁足，有人講係火氣大引起，有人講係面無洗淨，毋過，同學都知，這係後生人个專利，記錄吾等个青春，因致長薯个名又安做青春痘。

長薯係得人畏个違章建築，斯像在該平順个路面翹起來个人孔蓋；像光滑个球面頂該粒搵毋落去个嘍風嘴。若係歸面生去密密又貢膿，這時節定著愛注意感染个風險，若無正經斯會分佢搵去無結無煞，斯驚一無注意生在白幼个面項，嘎變做礫礫砣砣个「月球表面」，到該時節自家斯高不將刻耐「戴月球」咧。

為著愛同長薯這外星人个攻擊輸贏，佢決定進行作戰計劃，經驗豐富个阿姆，順利坐上指揮官个大位。因致鼻公頭該粒盡大粒盡疾，盲熟又極毋得²，阿姆拿出厥秘密武器：綠豆粉同蜂糖，佢同這兩項攪共下，膏在吾个鼻公頭，佢同阿姆講，鼻公會分蟻公扛走無？阿姆緊笑緊視佢應講：「佢頭擺斯恁泥膏好个，比得

¹ 逆眼：音 ngiag` ngien^；礙眼。

² 極毋得：音 kid` m` ded^；不能擠壓。

你這下个樣，仰脣都毋會較慘啦！」。

阿姆又講，食个東西使毋得忒躁，火氣大長薯正會緊啱。佢同同學下課个時節，固定會去賣鹽酥雞个攤買雞排，炸去酥酥香香个雞排，單淨恸著斯會流口涎，過再愛趕上暗晡頭个課，雞排係當多學生已好个選擇。阿姆不時交代毋好緊食這兜有个無个，買一坵麵包先砣肚屎，轉來正食正餐乜使得。毋過，斯係當難管好這張嘴啊！為著自家頭面个春光，吾心肝肚想，死馬做生馬醫，斯聽阿姆个好咧！乜來調整一下飲食个習慣。阿姆个秘密武器毋單淨綠豆粉同蜂糖，還有笏瓜、油蔥³、黃連，菊花茶……，膏个食个樣樣齊。

逐暗晡洗好身腳到睡目个一細段時間，佢會搞手機放冗心情。這時節，登真个指揮官——阿姆，定著會來推門，門个該片阿姆大聲放送：「目睡毋罇，長薯毋會好哦！」雖然抗痘个過程有兜難耐⁴，好得，佢這下个面有緊來緊光滑咧。

³ 油蔥：音 rhiu` cung+；蘆薈。

⁴ 難耐：音 nan` ngai`；難以忍受。